



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XII

BROJ: 201

DATUM: 17.04.2015.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Nermin Fatkić, viši saradnik za finansijska pitanja
fax: + 387 33 552 810
nermin.fatkić@sogfbih.ba

Sadržaj biltena:

Mostarski gradonačelnik pozvao novu vlast da promjeni odnos prema lokalnoj samoupravi

SIDA i EBRD donirali 2 mil. eura za komunalnu infrastrukturu u Gradačcu

Održane dvije obuke iz javno-privatnog partnerstva

U toku održavanje konsultativnih sastanaka o strateškim dokumentima Saveza

U Općini Novo Sarajevo održan sastanak načelnika gradskih općina

U Travniku održan sastanak općina kojima imaju partnerske općine u Turskoj

Načelnici sarajevskih općina sastali se sa kantonalnim premijerom

Najava sastanka predstavnika Saveza sa poslanicima oba doma federalnog parlamenta

Najava obilježavanja dana općina za mjesec maj / svibanj i bitni datumi za Savez

Bilten Saveza općina i gradova Federacije Bosne i Hercegovine

MOSTARSKI GRADONAČELNIK POZVAO NOVU VLAST DA PROMJENI ODNOS PREMA LOKALNOJ SAMOUPRAVI

MOSTAR, 14. april/travanj – Mostarski gradonačelnik Ljubo Bešlić pozvao je predstavnike novoformirane vlasti u BiH na promjenu dosadašnjeg odnosa prema jedinicama lokalne samouprave, a posebice prema Mostaru, javljaju iz Ureda za odnose s javnošću Grada Mostara.

„Trenutak je kada čestitamo novoizabranim dužnosnicima na imenovanjima, ali također i da izrazimo nadu kako će nova vlast promijeniti dosadašnji odnos prema jedinicama lokalne samouprave, posebice prema Mostaru, gradu koji je bio najrazrušeniji u zemlji nakon rata i gradu koji je to i danas, a nažalost jedan je od rijetkih višenacionalnih gradova u BiH“, kazao je Bešlić, govoreći na otvorenju Međunarodnog sajma gospodarstva - Mostar 2015.

Naglasivši kako ukupna gospodarska situacija u našoj zemlji trenutno nije optimistična, mostarski gradonačelnik kazao je kako to najbolje osjeti lokalna vlast koja je u svakodnevnom kontaktu s građanima.

„Današnji problemi građana su sve izraženiji, a lokalne zajednice nemaju sredstava za rješavanje nagomilanih problema“, upozorio je Bešlić koji smatra da je temeljni uvjet za gospodarski napredak Mostara i BiH taj da postanu faktor stabilnosti, suradnje i napretka. To se, po njegovim riječima, može ostvariti jedino uz političku stabilnost i institucionalnu ravnopravnost.

„Poželio bih da ovaj sajam danas poluča epitet mjesta na kojem se svi ugodno osjećaju. Ako to ostvarimo, za posljedicu ćemo imati brži razvoj BiH i bolji i sigurniji život građana, a što nam je svima cilj“, kazao je mostarski gradonačelnik.



SIDA I EBRD DONIRALI 2 MILIONA EURA ZA KOMUNALNU INFRASTRUKTURU U GRADAČCU



Švedska razvojna agencija u BiH (SIDA) i Evropska banka za obnovu i razvoj u Sarajevu (EBRD) potpisali su danas u Gradačcu ugovor s Javnim poduzećem "Komunalac" o donaciji 2 miliona eura za provedbu projekta vodoopskrbe, izgradnje kanalizacijske mreže i postrojenja za prečišćavanje otpadnih voda.

Direktor ureda Evropske banke za obnovu i razvoj u Sarajevu Ian Brown kazao je kako će donirana sredstva omogućiti da više od 90 posto kućanstava u Gradačcu dobije pitku vodu.

Brown je dodao da će prečišćena otpadna voda biti u skladu sa zakonskim propisima BiH i standardima

Europske unije.

Voditeljica Ureda Švedske razvojne agencije u BiH Marie Bergstrom kazala je kako je Švedska opredijeljena za unapređenje zaštite okoliša i unapređenje uvjeta životne sredine.

"Švedska je usvojila novu strategiju za suradnju u BiH za razdoblje do 2020. godine i po toj strategiji jedan od važnijih smjerova djelovanja je unapređenje okoliša i životne sredine s glavnim ciljem da se pomogne zemlji u pristupanju EU", naglasila je Bergstrom.

Općinski načelnik Edis Dervišagić kazao je kako će cjelokupan projekt koštati oko 9 miliona eura, od čega su 6 miliona eura kreditna sredstva, a ostalo donacije SIDA, EBRD-a i Vlade Republike Češke.



ODRŽANE DVIJE OBUKE IZ JAVNO – PRIVATNOG PARTNERSTVA

U okviru Sistema obuke za jedinice lokalne samouprave, Savez općina i gradova FBiH će, tokom mjeseca aprila/travnja održati četiri obuke na temu „Razvoj javno – privatnog partnerstva u jedinicama lokalne samouprave.“

Obuke su jednodnevne, a namijenjene su, prije svega izabranim zvaničnicima – vijećnicima, s tim da je omogućeno učešće i načelnika i državnih službenika.

Primaran cilj obuke jeste pomoći izabranim zvaničnicima u procjeni mogućnosti razvijanja JPP kao oblika podsticaja u razvoju i zapošljavanju u JLS. Cilj je pomoći u unaprijeđenju funkcije upravljanja imovinom i sredstvima JLS i aktivno uključivanje u proces kreiranja novih prihoda za JLS zasnovanim na komparativnim prednostima i mogućnostima JPP.

Tokom obuke, učesnici imaju priliku upoznati se sa relevantnim zakonskim okvirom koji uređuje ovu oblast, zatim, upoznat će se sa strategijom i procedurama ugovaranja JPP, različitim modalitetima izbora JPP i razmijeniti iskustva u ovoj oblasti.

Predavač na obuci je dr Željko Rička, vanredni profesor na Ekonomskom fakultetu Univerziteta u Zenici, a obuke će se održati u četiri regionalna lokaliteta za obuku, i to:

Bosanski Petrovac - 10.04.2015., za učesnike iz općina: Bihać, Bosanska Krupa, Bosanski Petrovac, Bosansko Grahovo, Bužim, Cazin, Dobretići, Drvar, Jajce, Ključ, Sanski Most i Velika Kladuša.

Tomislavgrad - 13.04.2015., za učesnike iz općina: Čapljina, Čitluk, Mostar, Neum, Prozor-Rama, Ravno, Stolac, Glamoč, Jablanica, Konjic, Kupres, Livno, Grude, Ljubuški, Posušje, Široki Brijeg i Tomislavgrad.

Tuzla - 20.04.2015., za učesnike iz općina: Banovići, Čelić, Doboju, Doboju Jug, Domaljevac – Šamac, Gračanica, Gradačac, Kalesija, Kladanj, Lukavac, Maglaj, Odžak, Olovo, Orašje, Sapna, Srebrenik, Teočak, Tešanj, Tuzla, Usora i Živinice.

Vitez - 23.04.2015., za učesnike iz općina: Breza, Bugojno, Busovača, Centar Sarajevo, Dobretići, Donji Vakuf, Fojnica, Goražde, Gornji Vakuf-Uskoplje, Hadžići, Ilidža, Ilijaš, Kakanj, Kiseljak, Ključ, Kreševo, Novi Grad Sarajevo, Novi Travnik, Novo Sarajevo, Pale-Prača, Sarajevo Grad, Stari Grad Sarajevo, Travnik, Trnovo, Foča-Ustikolina, Vareš, Visoko, Vitez, Vogošća, Zavidovići, Zenica, Žepče.



Sa obuke u Bosanskom Petrovcu



Sa obuke u Tomislavgradu

U TOKU ODRŽAVANJE KONSULTATIVNIH SASTANAKA O STRATEŠKIM DOKUMENTIMA SAVEZA

Savez općina i gradova Federacije BiH je od avgusta/kolovoza 2014. godine započeo proces izrade novih strateških dokumenata za period 2015. – 2019.

Novi strateški dokumenti se rade na osnovu prepoznatih potreba i očekivanja od strane članica Saveza, kao i uvažavajući prepoznatljivu i rastuću ulogu Saveza. Podršku za izradu strateških dokumenata pruža Ambasada Kraljevine Švedske – Sida, kroz projekat „Strateški okvir za daljnji razvoj saveza lokalnih vlasti u BiH“.

Kako bi izradio što kvalitetnije dokumente, Savez organizuje i regionalne konsultativne sastanke s ciljem unapređenja nacrtu strateških dokumenata.

Prva prezentacija novih dokumenata održana je na sjednici Predsjedništva Skupštine Saveza u Čitluku, 04. marta/ožujka 2015. godine. Prezentaciji su prisustvovali načelnici općina Bužim, Tomislavgrad, Goražde, Vogošća, Konjic, Grude, Novo Sarajevo, Čitluk, Busovača, Zenica, Čapljina i Mostar kao i predstavnici Ambasade Švedske Kraljevine – SIDA. Nakon prezentacije i diskusije novi strateški plan je pozitivno ocijenjen uz određene prijedloge.

*Podršku za izradu
strateških dokumenata
pruža Ambasada
Kraljevine Švedske – Sida,
kroz projekat „Strateški
okvir za daljnji razvoj
saveza lokalnih vlasti u
BiH“.*

Nakon toga održana su još tri regionalna sastanka.

Prvi je održan 26. marta/ožujka u Konjicu, Hotel „Garden city“ gdje su prisustvovali načelnici i predstavnici općina Prozor-Rama, Stari Grad, Mostar i Novo Sarajevo. Nakon uvoda i prezentacije nacrtu strateških dokumenata uslijedila je diskusija te zaključci i budući koraci, a komentari su naknadno poslani na adresu Saveza.

Drugi sastanak održan je 31. marta/ožujka u Bihaću, Hotel „Opal“ gdje su prisustvovali načelnici i predstavnici općina: Glamoč, Bihać, Cazin, Sanski Most i Bužim. Iz diskusije su izvučeni značajni zaključci i komentari na novi strateški plan koji su bili jako korisni.

Treći sastanak održan je 16. aprila/travnja u Zenici, Hotel „Dubrovnik“ na kojem su prisustvovali predstavnici općina: Donji Vakuf, Tavnik, Vitez, Ilijaš, Kakanj, Maglaj, Novi Travnik, Breza i Kiseljak.

Četvrti i posljednji sastanak biće održan 23. aprila/travnja u Tuzli, Hotel „Tuzla“.



Sa sastanka održanog u Zenici

U OPĆINI NOVO SARAJEVO ODRŽAN SASTANAK NAČELNIKA GRADSKIH OPĆINA



Na inicijativu načelnika Općine Novo Sarajevo Nedžada Koldže, 14. aprila u zgradi Općine održan je zajednički sastanak načelnika gradskih općina. Sastanku su prisustvovali, pored domaćina načelnika Nedžada Koldže i njegovih saradnika, Semir Efendić načelnik Općine Novi Grad Sarajevo, Mustafa Resić savjetnik načelnika Općine Centar Sarajevo, Slobodan Nikolić savjetnik načelnika Općine Stari Grad Sarajevo i Suad Handanagić pomoćnik načelnika Općine Stari Grad Sarajevo, navodi se na

web stranici Općine Novo Sarajevo.

Tema sastanka bilo je razmatranje Nacrta Odluke o davanju saglasnosti na tekst Sporazuma Grada Sarajeva i gradskih općina o vršenju komunalnih djelatnosti, te razmatranje Nacrta Strateškog plana Saveza općina i gradova FBiH za period 2015 - 2019. godina i Nacrta Akcionog plana Saveza 2015 - 2016. godina.

Obzirom da je Gradska uprava Grada Sarajeva dostavila svim gradskim općinama Nacrt Odluke o davanju saglasnosti na tekst navedenog Sporazuma, kojim se, između ostalog na znatno drugačiji način regulišu odnosi u oblasti vršenja komunalne djelatnosti, načelnici i predstavnici gradskih općina složili su se da se ova oblast ne može definisati i regulisati Sporazumom, niti istim načelnici mogu prenijeti nadležnosti općina na drugi nivo vlasti. Imajući u vidu činjenicu da većinu navedenih aktivnosti iz teksta Sporazuma, jedinice lokalne samouprave već realiziraju u okviru svojih djelatnosti, te da je veliki dio ovih djelatnosti u nadležnosti Kantona Sarajevo, odnosno KJKP „Park“ i „Rad“, donesen je zaključak da se na nivou gradskih općina formira tim koji će u što skorijem vremenskom periodu sagledati sve činjenice i donijeti zajednički stav koji će se dostaviti predlažu Nacrtu.

Budući da je u toku Javna rasprava o Nacrtu Strateškog plana Saveza općina i gradova FBiH za period 2015 - 2019. godina i Nacrta Akcionog plana Saveza 2015 - 2016. godine, a imajući u vidu da Nacrt ovih strateških dokumenata Saveza ne sadrže prioritete vezane za lokalne zajednice, na sastanku je donesen zaključak da se formira zajednička radna grupa koja će donijeti zajednički stav gradskih općina o svim strateškim dokumentima Saveza općina i gradova FBiH, te isti prosljediti Savezu u toku Javne rasprave.

Načelnici su iskoristili priliku da na ovom sastanku donesu i zajednički stav kada je u pitanju Nacrt Zakona o premjeru i katastru nekretnina FBiH, obzirom da su mišljenja da je ovaj Zakon više štetan nego provodiv, jer bi, između ostalog, doveo do dodatnog sukoba nadležnosti, zatim do bitnog smanjenja efikasnosti gdje bi, nažalost najviše ispaštali građani.

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmedeu.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

Tema sastanka bilo je razmatranje Nacrta Odluke o davanju saglasnosti na tekst Sporazuma Grada Sarajeva i gradskih općina o vršenju komunalnih djelatnosti, te razmatranje Nacrta Strateškog plana Saveza općina i gradova FBiH za period 2015 - 2019. godina i Nacrta Akcionog plana Saveza 2015 - 2016. godina.



U TRAVNIKU ODRŽAN SASTANAK OPĆINA KOJE IMAJU PARTNERSKE OPĆINE U TURSKOJ

TRAVNIK, 10. april/travanj - Općina Travnik danas je bila domaćin sastanka Saveza općina i gradova Federacije Bosne i Hercegovine, Unije općina Turskog svijeta (TDBB) i načelnika općina iz Bosne i Hercegovine koje imaju partnerske odnose sa nekim od turskih općina.

Sastanku je, u ime Saveza općina i gradova FBiH, prisustvovala direktorica Vesna Travljanin, a u ime Unije, generalni sekretar Dr. Fahri Solak.

Cilj ovog okupljanja je ostvarivanje što bolje saradnje između općina članica Unije, kao i sumiranje prethodnog



programa u R.Turskoj, te povezivanje i drugih općina koje su aktivne na polju međunarodne saradnje i svoj prosperitet zasnivaju na međunarodnoj saradnji a sve u cilju privlačenja stranih investicija kroz promociju koje i ovakvi sastanci nude. Najznačajnijim ipak se smatra uspostavljanje saradnje između entitetskih Saveza gradova i općina Bosne i Hercegovine i Unije općina turskog svijeta, navodi se na web stranici Općine Travnik.

Na ovom sastanku gosti iz Turske održali su kratku video prezentaciju o Uniji i projektima koje su u prethodnom period realizovali u Bosni i Hercegovini.



NAČELNICI SARAJEVSKIH OPĆINA SASTALI SE SA KANTONALNIM PREMIJEROM



Premijer Kantona Sarajevo Elmedin Konaković i ministri u Vladi KS danas su održali radni sastanak s načelnicima sarajevskih općina, na kojem je razgovarano i o Nacrtu zakona lokalne samouprave, navodi se na web stranici Kantona Sarajevo.

Ovo je prvi sastanak premijera s čelnim ljudima lokalne samouprave u kojima se, kako je kazao načelnik Općine Vogošća, **Edin Smajić**, odvija realan život.

Razgovarano je o suštinskim stvarima koje su potrebne da bi vlada KS i jedinice lokalne samouprave mogle

efikasnije i kvalitetnije provoditi projekte koji imaju veliki značaj za građane, a Smajić je rekao da se oni odnose na procedure koje dovode do novih radnih mjesta, ekonomskog razvoja i turizma, industrije koja je prijeko potrebna posebno u manjim općinama koje imaju industrijske i proizvodne kapacitete i veliki broj nezaposlenih.

„Trebamo one propise koji nisu efikasni u provođenju staviti van snage i donijeti nove da bismo učinili život građanima što boljim te tako stvoriti perspektivu razvoja da bi Sarajevo doveli do nivoa kojega ono zaista zasluhuje“ rekao je načelnik Smajić nakon sastanka.

Načelnik Općine Stari Grad **Ibrahim Hadžibajrić**, je istakao da je jedan od zaključaka današnjeg sastanka da će četiri gradske općine poslati određene prijedloge izmjena i dopuna zakona koji se mogu donijeti na nivou Kantona Sarajevo, a kojima bi se olakšao rad organa lokalne samouprave, postigla bi se veća efikasnost i učinkovitost, poboljšao bi se finansijski status općina, a „tu prije svega govorim o presudi Ustavnog suda FBiH iz 2010. godine koja nije nikada ispoštovana“.

Za načelnika Općine Novi Grad Sarajevo **Semira Efendića** današnji sastanak s premijerom i načelnicima govori da predstoji bolje vrijeme te da ima puno prostora za saradnju, a „mi smo upućeni jedni na druge naročito u oblasti propisa koje usvaja Skupština KS, a kojih se mi svi pridržavamo“.

„Govorili smo o konkretnim projektima u oblasti saobraćaja, vodovodne i kanalizacione infrastrukture, jer tu imamo puno posla, ali s dobrom voljom svih strana uz mjere štednje koje je vlada KS najavila, jednog efikasnijeg i domaćinskog upravljanja imamo razloga za optimizam“, rekao je načelnik Efendić.

"Trebamo one propise koji nisu efikasni u provođenju staviti van snage i donijeti nove da bismo učinili život građanima što boljim te tako stvoriti perspektivu razvoja da bi Sarajevo doveli do nivoa kojega ono zaista zasluhuje"

Ministar pravde i uprave, Enver Smajkan je sa premjerom Konakovićem i načelnicima govorio o Nacrtu zakona o lokalnoj samoupravi, i pojasnio da je on urađen na principima lokalne samouprave, a ostaje da se još jednom konsultira sa načelnicima kako bi taj Nacrt stavili u proceduru u septembru ove godine, a već krajem godine bi on mogao biti donesen.

„Najbitnije u tom zakonu je da on daje široku autonomiju općinama, a s druge strane osigurava materijalno funkcioniranje svih nivoa vlasti, općina, grada i kantona“, naglasio je ministar Smajkan.

Premijer Konaković je zaključio da je današnji sastanak pokazao da su načelnici operativni, da poznaju svaki segment problematike života u Kantonu.

Rekao je da će biti još ovakvih sastanaka, barem jednom mjesečno, jer su danas postavili zadatak koji su vrlo operativni, a na narednim sjednicama Vlade KS će se već krenuti u izmjenu određenih akata i zakona kojima se poboljšava komunikacija u sferi prostorno-planske dokumentacije, kontakta sa komunalnim preduzećima.

Za premijera Konakovića, prioriteti su već definirani problemi u sferi komunalne privrede, kao i olakšani pristup investitorima.



KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmamed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

NAJAVA SASTANKA PREDSTAVNIKA SAVEZA SA POSLANICIMA OBA DOMA FEDERALNOG PARLAMENTA

Suradnja između Parlamenta Federacije Bosne i Hercegovine i Saveza općina i gradova Federacije Bosne i Hercegovine (SOGFBiH) predstavlja značajan aspekt u procesu uspostave poticajnog okruženja za razvoj jedinica lokalne samouprave.

Stoga je pokrenuta inicijativa za održavanje zajedničkog sastanka između predstavnika oba Doma Parlamenta Federacije Bosne i Hercegovine i SOGFBiH, na kojem će se razgovarati o mogućim modalitetima suradnje i oblastima za izradu/razmatranje pravnih propisa od posebnog značaja za jedinice lokalne samouprave. Sastanak se organizuje uz podršku USAID Projekta jačanja institucija vlasti i procesa u BiH i USAID Sida Projekta unapređenja lokalnog razvoja.

Sastanak će se održati u ponedjeljak 20. aprila/travnja 2015. godine u zgradi Parlamenta Federacije Bosne i Hercegovine, velika sala, sa početkom u 11,00 sati.

Pored predstavnika oba Doma Parlamenta FBiH i SOGFBiH, sastanku će prisustvovati i predstavnici drugih međunarodnih organizacija i zainteresiranih subjekata. Nadamo se da će ovaj sastanak rezultirati uspostavom kontinuirane suradnje između parlamentarnih tijela i SOGFBiH.

NAJAVA OBILJEŽAVANJA DANA OPĆINA ZA MJESEC MAJ / SVIBANJ I BITNI DATUMI ZA SAVEZ

- **02. maj/svibanj - Dan Općine Centar Sarajevo.** Naime, toga dana 1992. godine dešavale su se presudne bitke za odbranu Predsjedništva RBiH.
- **02. maj/svibanj - Dan Općine Stari Grad.** Toga dana, 1992. godine dešavale su se presudne bitke za odbranu Starog Grada i Sarajeva, kao što su borba za kasarnu Druge armijske oblasti, presijecanje kolone motornih vozila u Dobrovoljačkoj ulici, odbrana zgrade Predsjedništva i oslobađanje predsjednika Predsjedništva BiH Alije Izetbegovića.



- **05. maj/svibanj -** Na sastanku CEMR-a (Vijeće evropskih općina i regiona), održanom u Reykjaviku 5. maja 2008.g., potvrđen je prijem Saveza općina i gradova Federacije BiH u punopravno članstvo. Ova organizacija je najveća organizacija lokalnih i regionalnih vlasti u Evropi. Njene članice su nacionalne asocijacije gradova, općina i regija iz više od 30 zemalja i predstavljaju više od 100.000 lokalnih i regionalnih vlasti. CEMR ima urede u Parizu i Briselu. Cilj ove organizacije je promoviranje ujedinjene Evrope zasnovane na lokalnoj i regionalnoj samoupravi i demokratiji.



Centar Sarajevo



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Gledajte Savez općina i gradova Federacije Bosne i Hercegovine na



Pratite Savez općina i gradova FBiH na



facebook

Savez općina i gradova Federacije Bosne i Hercegovine

- **08. maj/svibanj - Dan Općine Kladanj** i dan formiranja Teritorijalne odbrane 1992. godine.

- **15. maj/svibanj - Dan Općine Usora.**

- **16. maj/svibanj - Dan Općine Novo Sarajevo.** Ovaj datum simbolizira "Pofaličku bitku", kojom je 1992. godine agresoru onemogućeno da podijeli Sarajevo.

- **20. maj/svibanj - Dan Općine Bugojno.** Na ovaj datum 1886. godine prvi put zasjeda Gradsko vijeće Bugojna, što predstavlja i prvi oblik parlamentarizma, demokratije i političkog djelovanja kroz državne institucije vlasti. Inače, Bugojno kao selo prvi put se spominje 1574. godine.

- **23. maj/svibanj - Dan Općine Kalesija.** Na ovaj dan 1992. godine jedinice Armije BiH oslobodile su uže područje Kalesije čime je postala prvi oslobođeni grad u BiH.

- **24. maj/svibanj - Dan Općine Čitluk.** Na taj dan 1306. godine Čitluk, odnosno Brotnjo, prvi put se spominje u trgovačkim odnosima s Dubrovnikom.

- **25. maj/svibanj - Dan Općine Bosanski Petrovac.**

- **27. maj/svibanj - Osnovana Mreža lokalnih i regionalnih vlasti jugoistočne Evrope.** Savez općina i gradova FBiH 27.05.2004. godine, zajedno sa drugim savezima lokalnih vlasti iz regije osniva Mrežu nacionalnih asocijacija lokalnih vlasti jugoistočne Evrope - NALAS, čime postaje član - osnivač NALAS-a.

- **28. maj/svibanj - Osnivačka skupština Saveza općina i gradova Federacije BiH.** U Mostaru je 29.05.2002. godine održana Osnivačka skupština sadašnjeg Saveza općina i gradova Federacije. Tom prilikom Savezu su pristupile 54 članice.

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.


Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.


Sa zadovoljstvom očekujemo vaše komentare, sugestije i primjedbe.



Stari Grad Sarajevo



Kladanj



Novo Sarajevo



Bugojno